

## 赤壁風雲（唐健垣唱）

— 孔明過江 —

【八板南音板面】（白：話說漢室末年，國祚日衰，曹操繼董卓，脅天子以令諸侯；劉備結關張，訪臥龍孔明先生而圖帝業，時維建安十二年。曹操率大軍南下，沿河備兵，劉備攜民渡江，曹兵枕漢水之要津，孫權據東吳之險地，赤壁戰雲密布。長江暗翻惡浪，呢一場大戰究竟如何展開，請聽我一一道來。）

【南音】艤舫千艘，百萬貔貅。曹兵鎖斷漢江流。  
傳檄到東吳，勸佢莫作龍虎鬥，不若共擒劉備，我哋分佔荊州。  
孫權接信一讀，咁就雙眉皺，召集文武大臣，共議良謀。

【中板】嗰啲文官主和，武將主鬥，一個係磨拳擦掌，一個擺腦不休。  
魯肅在旁，不置可否，佢暗諫孫權，莫向曹操低頭。  
劉備佢在荊襄曾敗走，當知曹兵虛實，是劣還優。  
待我親自過江來問候，向劉備問候，睇吓是否共同擒虎，抑或助虎捉劉。

【乙反】嗰個劉玄德自從兵敗後，投奔江夏暫棲勾。  
諸葛孔明陪左右，勸慰皇叔莫耽愁。  
佢話承皇你三顧草廬，恩義厚，我孔明此生要盡瘁鞠躬，死方休。  
主上，一時勝敗兵家事常有，他日三分天下，志可酬。  
不意欲抗曹操，須與東吳聯手，我哋從中取利，可以據荊州。  
說服孫權，我有蘇秦口，【慢板】我哋要分敵友，我願隨魯子敬去見孫仲謀。【中腔】

（白：孫仲謀即係孫權嗎！）

— 智激周瑜 —

（且說孫權同將軍周瑜知道曹軍大軍壓境，立即趕至柴桑，孫權與百官齊來議計。周瑜主張一戰，不願事曹，正在此時，聞報魯肅引薦孔明，拜會商量合作擒曹操，當下派遣周公瑾相迎。周瑜下禮呀！）

【正線】一個是人中英彥，一個係天上謫仙。周瑜係東吳名將，佢文武雙全。  
孔明係南山臥龍，胸藏萬卷，佢哋奇才相遇，施展舌劍唇鞭。  
周公瑾安邦不讓張良智，孔明助漢主，亦有姜尚賢。（白：見面啦。）

【中板】素仰諸葛先生你神機妙算，請問有何良策，可攻堅。（白：不敢當。）  
辱承下問，我自慚淺見，（白：不如咁哩。）將軍你一語定亡存。（白：非也非也。）  
我周公瑾一向主和不主戰，為保東吳好山川。（白：主和呀你，哈哈）  
嗰陣孔明大笑，笑到頭上綸巾顫，（白：笑咩呀。）周瑜佢又詐怒，睜得眼睜圓。

（周瑜白：孔明先生何故發笑。）

孔明白：將軍欲使曹操退兵，不必主和，你只要獻出二人，事必諧矣。

周瑜白：獻出邊兩個？

孔明白：哦！當年范蠡獻西施，姑蘇遊糜鹿，漢帝獻王嬙昭君，中原免干戈，你欲退曹兵，端賴二個美人身上，哈哈！)

【中板】我笑曹操，艷福真不淺，春深銅雀鎖嬋娟。  
佢欲得二喬嚟到娛晚境，想話紅顏伴白髮你話幾咁可憐。

(周瑜白：邊有咁嘅事。曹操都搵兩個美女嚟咩，點會呀，你分明做謠。  
孔明白：將軍不信，有賦為證。佢個仔作咗個銅雀台賦，講呢件事，你睇佢爸爸幾風流。)

曹操幼子，名喚曹子建，為銅雀新台作賦一篇。  
我愛此詞係文章富艷，等我讀與將軍一聽，便知無虛言。  
(白：咁孔明就唸銅雀台賦啦。)

【流水】周瑜聽罷勃然色變，我誓誅曹賊不共戴天。(白：喂，孔明！)  
【中板】你可知二喬係誰家女眷，(白：呢層我就唔知囉！)一個係孫策夫人，一個係我內助賢。(白：哎呀，對唔住將軍。)  
難怪將軍你聽到頻按劍，嗰個猖狂曹賊，真係色膽包天。  
我實不知阿小喬係將軍寶眷，剛才我冒犯，請恕失言。(白：曹操真係衰。)

【流水】丈夫報國頭可斷，豈受曹瞞任宰煎。  
我周瑜早有請纓願，三軍秣馬枕戈眠。  
我哋不若聯手破曹同作戰，替漢室除害共比肩。  
周瑜孔明舉杯同立願，【慢板】諸葛搖羽扇，可憐魯肅，冷汗抹不完。【腔】

### — 蔣幹說降 —

(白：又到嗰邊曹操點樣計劃對付東吳與劉備。  
話說曹操欲破東吳，惟是忌憚周瑜嘅利害，曹營中有一個幕僚，姓蔣名幹，字子驥，與周瑜自幼相交。佢向曹操誇言，話可說服周瑜歸順，曹操聽罷大喜，好！命你過江而去見周瑜，說佢降服我曹某。  
究竟此行是否成功，請聽下文。)

### 【南音短序】

【中板】周公瑾，會同窗。佢深明蔣驥來意，早有關防。  
(白：說我投降係嗎，好！)周瑜練列兵、列隊迎蔣幹，甲冑鮮明錦衣裝。  
你自曹營而來過訪，此行莫非勸我歸降。(白：唔係。)  
蔣幹聞言，忙否認，阿賢弟你多疑，實不該。  
我不過係心念故人，所以來相訪，我哋不談國事，不論興亡。

(白：周瑜就諗，不談國事，我哋依家敵對。  
你坐船仔相訪，我梗係大事迎接你，如果唔係，話我私通你哋曹操。  
我都諗到你係嚟勸我歸降。)

歸降我就唔降，我哋曾經有兩個將軍降咗去曹操，依家幫你訓練水兵，  
等我詐諦當呢兩個將軍佢哋降咗去曹操，其實仲暗通消息返來話要約我去攻曹操，  
然後我詐醉，呢一封信就詐諦比阿蔣幹你偷到，豈不是你就叫曹操殺咗佢兩個降將。  
好！等我飲酒先。  
周瑜話，不談國事係嗎，好、好！)

今日難得與故人同歡暢，拋下控德戎馬我哋醉千觴。  
我哋休談國事，同歡暢，有違此令者，(白：太史卿，將佢斬咗。)  
有違此令教他劍下亡。  
三尺龍泉如雪亮，攪到蔣幹當堂，坐立不安。  
周瑜舉杯，頻勸飲，更留好友共宿在營房。  
公瑾飲到沉沉大醉，(白：不過係詐醉。 ) 子驥訓唔著，惴惴不安。  
終宵難寐，難合眼，輾轉反側暗徬徨。  
(白：死啦，又唔敢開口叫佢投降，燭光之下， ) 又見一疊文書擺在案，  
(白：等我靜雞雞睇吓，探吓軍情都好呀。 ) 我欲探軍情搜索看。(白：咦！嘩！。 )  
呢一度係有一封書信，(白：係阿蔡瑁、張允寄返嚟啲， ) 二人要暗害曹丞相，  
原來蔡瑁、張允兩個立了壞心腸。  
蔣幹偷偷回頭望，只見周瑜打猛鼻鼾，入了黑甜鄉。  
佢夢裏猶呼，(白：詐諦叫，誅曹賊呀！ ) 嚇得蔣幹快把文書在袖中藏。  
(白：我都唔好訓，不如依家走吧。 )  
明朝若被周瑜發覺，一定難饒諒，等我走為上計，免遭殃。  
佢就蛇行鼠伏，出營帳，披星戴月，渡歸航。  
周瑜借刀殺人，要除降將，佢偽造呢封書函騙同窗。  
呢個不知利害嘅愚蔣幹，【慢板】佢勸降不遂，反冤降。  
...  
...